



Publicaziuns dalla vischnaunca, jamna 48

Annunzia da baghegiar

All'istanza da baghegiar ei sin fundament digl art. 64, alinea 2 dalla lescha da baghegiar e digl art. 40 dall'ordinaziun davart la planisaziun dil territori dil cantun Grischun OPT vegniu annunziou ils suandonts projects:

Nr. 2023-2081.000

Patrick Thomann, Gstell 735, 9426 Lutzenberg; sanaziun dil mir da crap, parcella 791, Via Veglia 2, 7180 Disentis/Mustér.

Nr. 2023-2083.000

Vischnaunca Disentis/Mustér, Via Cons 2, 7180 Disentis/Mustér; colligiazion denter la casa da scola e scoletta cun in cabel da glas pil niev sistem d'alarm, parcelas 959 e 688, Via da Scola 5, 7180 Disentis/Mustér.

Uffeci da baghegiar Disentis/Mustér

Cussegl da vischnaunca

Il cussegl da vischnaunca seraduna **gievgia, ils 7 da december 2023**, allas 18.00 en Sala Peter Kaiser dalla Claustra Mustér.

Tractandas:

1. Protocol 26-2021/2024
2. Pendicularas Mustér SA: Contract da dretg da baghegiar e da servitud (messadi 44-2021/2024)
3. Agenda 2024 (messadi 45-2021/2024)
4. Ura da damondas (conform ad art. 44 dil regulativ da fatschentas)
5. Elecziuns:
 - 5.1 dil president ni dalla presidenta dil cussegl da vischnaunca per 2024
 - 5.2 dil vicepresidente ni dalla vicepresidente dil cussegl da vischnaunca per 2024

La presidenta dil cussegl da vischnaunca

Temps d'unviern – Restricziuns da carrar e mesiras da segirtad

Vias da funs, cultivaziun ed uaul

Duront il temps d'unviern eis ei scumandau da carrar cun tuts vehichels sin las vias da funs, cultivaziun ed uaul. Quei scamond vala mintgamai naven dils 15 da december entochen la fin da mars, respectivamein naven dil mument che las vias ein cuvretgas cun neiv. Rumir vias ei scumandau. Sendas da viandar d'unviern e sendas da gianellas Las sendas da viandar d'unviern sco era las sendas da gianellas (marcadas rosa) vegnan pridas en funcziun e mantenidas naven digl emprem da december 2023 entochen Pastgas 2024. Il bandunar sendas da viandar d'unviern e rutas da gianellas signalisadas, ni vias rumidas da neiv e tut semover ordeifer la zona da baghegiar succeda sin atgna responsabladad. Serradas da sendas, rutas e vias ein ligiontas per tuts e ston vegnir observadas (art. 6 e 10 dalla lescha davart l'organisaziun en cass da crisa).

Naven dall'entschatta december vegn il stan actual davart l'avertura da sendas da viandar d'unviern e sendas da gianellas communicaus silla pagina d'internet www.disentis.ch/strassen.

Nus supplichein da prender enconuschientscha da questas directivas e giavischein in bi temps d'unviern.

Bien engraziament per la capientscha ed observaziun.

Direcziun communal Disentis/Mustér



Rimnada da rumien da casa – fasa da test

Per haver indicaziuns pigl avegnir havein nus ordinau ch'ei vegni rimnau duront ina perioda da test da treis jamnas naven dils **27-11-2023 entochen ils 15-12-2023** mo inaga ad jamna il rumien en nossa vischnaunca.

La rimnada ha liug mintgamai la gievgia.

Nus supplichein l'entira populaziun da deponer futuramein il sac da rumien sulettamein els loghens defini persuerter (casettas da rumien e molocs).

Ils loghens tolerai entochen oz sper via vegnan sligiai per immediat.

Bien engraziament per Voss'enconuschientscha e cooperaziun en favur d'ina optimaziun dalla rimnada da rumien e dils cuosts persuerter.

Suprastonza communal

Clom da quens

Il quen communal vegn serraus giu cun ils 31 da december 2023. Per saver risguardar las expensas occurridas uonn el quen 2023 ei tut tgi che ha aunc da dar quen alla vischnaunca pigl onn current supplicaus da far quei entochen il pli tard **ils 18 december 2023**.

Nus supplichein tuttas firmas sco era tut ils officials dalla vischnaunca d'observar quei termin.

Bien engraziament.

Administraziun communal



Scaldaments mobils el liber Bulius da scaldar, radiaturs, radiaturs d'infratjetschen etc.

Sebasond sin art. 11, al. 2 dalla lescha cantunala d'energia en cumbinaziun cun art. 33 dall'ordinaziun cantunala d'energia ha il Departament da construcziun, traffic e selvicultura dil Grischun relaschau suandonta disposiziun:

Per mintga apparat da scaldar mobil - gas, electricitad ed ieli - che vegn duvraus el liber per intents commercials e che ha ina prestaziun da scaldar da maximalmeins 14 Kw sto vegnir cumpensau ina tonna CO₂. Per apparats cun ina prestaziun da sur 14 kW e cun ina prestaziun da scaldar maximala da 28 kW sto vegnir cumpensau duas tonnas CO₂ e per apparats cun ina prestaziun da scaldar maximala da sur 28 kW sto vegnir cumpensau treis tonnas CO₂ e.a.v. Silmeins 20% dall'immissiun CO₂ sto vegnir cumpensada en Svizra. Per scaldaments en tenda valan las medemas pretensiuns sco pils scaldaments el liber. Per mintga tonna che sto vegnir cumpensada sto vegnir taccau ina vignetta vid igl apparat da scaldar. Ina vignetta vala mintgamai in onn naven digl 1. da settember entochen ils 31 d'uost. L'obligaziun da cumprar ina vignetta exista naven dall'emprema gada ch'igl apparat da scaldar mobil vegn mess en funcziun durant la perioda da scaldar respectiva.

La cumpensaziun dall'immissiun da CO₂ succeda entras il possessur ni entras la vischnaunca. Sch'ils possessurs cumpenseschan sezs l'immissiun da CO₂, vegn la vignetta concedida gratuitameins entras la vischnaunca.

La cumpensaziun sto vegnir cumprovada cun in certificat d'ina interpresa specialisada sil sector dalla cumpensaziun da CO₂ (p.ex. myclimate). Per apparats da scaldar electrici sa l'obligaziun da cumpensar l'immissiun da CO₂ era vegnir ademplida, sch'ei vegn applicau

– per mintga tonna CO₂

che sto vegnir cumpensada – cumprovadameins 4'500 kWh d'electricitad ch'ei vegnida producida cun energias regenerablas. Sch'ils possessurs cumpenseschan buca sezs l'immissiun da CO₂, ston els cumprar tier la vischnaunca ina vignetta per mintga tonna CO₂ che sto vegnir cumpensada.

Il prezi per vignetta importa frs. 60.--.

Las vischnauncas impundan igl entir recav dalla venditada vignettas per cumpensar l'immissiun da CO₂. Igl uffeci d'energia e traffic metta a disposiziun in agid d'execuziun per las vischnauncas. Per decretar sancziuns en cass da cuntravenziuns, en special incassar multas, ein las vischnauncas responsablas (art. 36 s. LEG).

Las vignettas san vegnir retratgas tier l'administraziun communal.

Administraziun communal



Revisiun parziala dalla planisaziun locala «Zona da mistregn cun habitaziuns pintgas» Exposiziun publica da cooperaziun

En applicaziun dil art. 13 dall'ordinaziun cantunala davart la planisaziun dil territori per il cantun Grischun (OPTGR) ha liug l'exposiziun publica da cooperaziun per ina revisiun parziala dalla planisaziun locala dalla vischnaunca da Disentis/Mustér.

Object:

Revisiun parziala dalla planisaziun locala «Zona da mistregn cun habitaziuns pintgas»

Acts d'exposiziun:

- Lescha da baghegiar (art. 29b)
- Plan da zonas e plan general da formaziun 1:2000

Annexas:

- Rapport da planisaziun

Termin da publicaziun:

30 dis naven dils 24 da november entochen ils 27 da december 2023

Liug e temps d'exposiziun:

Casa communal (stanza nr. 10), Via Cons 2, 7180 Disentis/Mustér durant las uras da spurtegl ni online [www.disentis.ch/downloads/exposiziun publica da cooperaziun](http://www.disentis.ch/downloads/exposiziun_publica_da_cooperaziun). Propostas motivadas per midar ni cumpletar ils mieds da planisaziun ein da far a scret entochen ils 27 da december 2023 (datum dil bul postal) alla suprastanza communal, Via Cons 2, 7180 Disentis/Mustér.

Suprastanza communal Disentis/Mustér

Affittaziun da pastira

Sin primavera 2024 vegn liber pastira che la vischnaunca da Disentis/Mustér sa affittar a cultivaders(a). Interessai han la caschun da mirar las parcelas che stattan a disposiziun per l'affittaziun sin [www.disentis/downloads/Affittaziun da pastira](http://www.disentis/downloads/Affittaziun_da_pastira). L'affittaziun succeda tenor art. 3 dalla lescha d'agricultura, numnadamein:

1. Las annunzias vegnan risguardadas tenor successiun da lur entrada.
2. Ei exista negins cunfins da vischinar denter ils uclauns dalla vischnaunca Disentis/Mustér.
3. Las pastiras vegnan fittadas tenor ils suandonts criteris:
 - al menaschi ch'ei geograficamein il pli datier dalla pastira affittabla;
 - sin fundament dalla surfatscha dalla pastira gia affittada e tenor grondezia dil menaschi reclamein ed en proporziun;
 - en cass da plirs interessents per ina pastira vegn tratg la sort.

Annunzias per l'affittaziun ein d'inoltrar a scret cun indicar las surfatschas giavischadas entochen ils **3 da schaner 2024** al departament d'agricultura, Via Cons 2, Caum postal 57, 7180 Disentis/Mustér.

Per sclariment stat il gerau d'agricultura Clemens Berther (cultivaziun@disentis.ch) bugen a disposiziun.

Departament d'agricultura Disentis/Mustér



Seivs mobilas per la pasculaziun

Tenor art. 75, al. 1 dalla lescha da baghegiar ed art. 18 al. 1 dalla lescha d'agricultura ston tuttas seivs mobilas vegnir allontanadas sil pli tard treis dis suenter la pasculaziun. Quei vala era per seivs da gatter.

Las seivs buc allontanadas vegnan pridas naven senza avisar ils pertuccai sin donn e cuost dil proprietari da terren.

Nus supplichein da prender enconuschientscha da quei fatg e d'instradar las mesiras prescettas.

Uffeci d'infrastructura e baghegiar

Tagliar caglias e plontas

Tenor art. 75, al. 4 dalla lescha da baghegiar astgan plontas buca disturbar la vischinonza ni la segirtad publica. Per liung dallas vias publicas e privatas sco era sendas ein tuttas caglias e plontas da tagliar anavos, aschia che nuot survarga il cunfin (era buca suenter ch'ei ha neviu).

Quellas lavurs ston esser finidas sil pli tard entochen la **fin da november 2023**.

En cass che las caglias e plontas vegnan buca tagliadas anavos enteifer il termin fixau, vegnan quellas lavurs exequidas entras il menaschi tecnic dalla vischnaunca cun adossar ils cuosts als proprietaris.

Uffeci d'infrastructura e baghegiar



Pigniel da Nadal 2023

Il Menaschi tecnic dalla vischnaunca da Mustér organischescha uonn la vendita da pigneuls da Nadal. Ei vegn vendiu pignola mo sin empustaziun. Il pigniel sa vegnir retratgs ils **21 da december 2023** naven dallas 9.00 – 14.00 avon il luvratori dil Menaschi tecnic a Cuo. Sin giavisch e per in prezi surpli da frs. 5.– vegn il pigniel era furnius avon casa.

Il pigniel sa vegnir empustaus cul talun aschuntau **entochen ils 8 da december 2023**:

Adressa:

Uffeci forestal Disentis/Mustér

Caum postal 57

7180 Disentis/Mustér

telefon 081 920 36 36

Mail: uflepp@disentis.ch

Talun d'empustaziun

Num: _____

Prenum: _____

Adressa: _____

Telefon: _____

Pégn (Rottanne) 1.10 – 1.50 m CHF 28.– tocs

1.60 – 2.00 m CHF 31.– tocs

2.10 – 2.50 m CHF 35.– tocs

Pégn da Nordmann 1.10 – 1.50 m CHF 43.– tocs

1.60 – 2.00 m CHF 58.– tocs

2.10 – 2.50 m CHF 80.– tocs

Pinar sez il pigniel da Nadal!

Igl uffeci forestal dat era uonn la pusseivladad a mintga habitont ni hosp da Mustér dad ir egl uaul a pinar gratuitamein il pigniel da Nadal giavischau. Il selvicultur communal accumpogna ils interessai e dat in ni l'auter cussegl.

Nus s'entupein cun resti cauld, buns calzers ed in resgiut **mesjamna, ils 20 da december 2023, allas 13.30. Il liug da sentupada vegn publicaus 4 dis avon sut; www.disentis.ch/uaul**

Tagliar pignola en uauls da schurmetg, plontaziuns sco era ord seivs da schurmetg ei scumandau!

Per sclariment stat il selvicultur Simon Cathomen bugen a disposiziun.

Uffeci forestal Disentis/Mustér



Controlla da habitonts

Mortoris

Gérard Kiener-Flepp, naschius ils 15 da matg 1937, morts ils 23 da november 2023

Tresa Schmed, naschida ils 24 da settember 1942, morta ils 24 da november 2023

Administraziun communal Disentis/Mustér

Clom d'urgenza 118

Preziadas vischinas, preziai vischins

S'imaginei ch'ei brischa e negin vegn! Adina puspei caschunan fiugs gronds donns, gie mettan schizun en prighel la veta da persunas – savens perquei ch'ils pumpiers vegnan buca clamai ni memia tard.

Biars tratgan: zatgi ha bein alarmau, mo adina puspei ei quei buc il cass, era tier nus el Grischun. Perquei vala: Tier ina situaziun nua ch'ils pumpiers vegnan duvrai, ei da telefonar immediat al clom d'urgenza 118. Mo aschia eis ei garantii ch'agid professional arriva il pli spert pusseivel sil plaz.

Engraziel per Vies sustegn!

Vos Pumpiers Sursassiala

Biblioteca populara Disentis/Mustér e contuorn

Kino da cudischs da maletgs cun Mats, la miur

Has ti plascher da vegnir en biblioteca e tedlar marvegliusas historias ord cudischs da maletgs?

Venderdis, ils 8 da december 2023 allas 14.30 legin nus avon e mussein vid ina gronda preit ils maletgs ord in cudisch da maletgs. L'occurrenza cuoza ca. in'ura ed ei adattada per tut ils affons che san gia tedlar tier bein.

Naturalmein astgas ti era prender cun tei tia mumma ni in'otra persuna.

Mats, la miur ed il team dalla biblioteca

Apparat d'udida

Gliendisdis, ils 11 da december 2023 saveis Vus schar schubergiar e rugalar Vies aparat d'udida:

9.15–10.30 en Casa sogn Martin a Trun

11.00–11.45 en Casa sogn Giusep a Cumpadials

13.15–14.30 el PUNTREIS, Center da sanadad a Mustér

Dunna Giger dalla firma Amplifon AG e signur Gfeller dalla firma Jäggi Optik & Hörberatung AG surprendan comunablamein quei survetsch gratuit per tuts interessents.

Ei drova negina annunzia.



Sentupada cun Sontgaclau pils affons pigns

Bimbimbim – Sontgaclau vegn cun stgalin! Dalla proxima seruschnada vegn Sontgaclau sin viseta. Nus envidein tut ils affons entochen quater onns ensemen cun fargliuns ed ina persuna carschida ad ina sentupada cun Sontgaclau sin plaz scola da Segnas. Suenter la viseta dat ei aunc in sitg cauld. **Mesjamna, ils 6 da december 2023** allas 9:45 plaz da scola Segnas - Artgin. Cuosts: 5.– per affon.

Annunzias ein d'inoltrar entochen igl '1. da december tier Adela Bisquolm, 079 561 85 91ni Carla Flury, 078 716 85 44.

Nus selegrein sin vossa viseta!

Uniun da dunnas Disentis/Mustér, ressort affons

Uniuns da giuventetgna Mustér

Sontgaclau a Mustér, ils 9 da december 2023

13:30 Sontgaclus e lur suitas el vitg prelecziun dils oremus en differentas ustrias dil vitg entochen las 15:00
13:30 program per affons pigns a S. Gada ils affons pigns e lur famiglias serimnan avon caplutta, beneventar comunablamein il Sontgaclau e sia fumeiglia ed accumpignar el entochen sil plaz scola
15:00 baselgia S. Gionssurvetsch divin da famiglia, silsuentar piziulta e bubronda caulda avon baselgia

Annunzia per la viseta da Sontgaclau e sia suite a casa **entochen ils 6 da december 2023.**

Vitg

Ramona Simonet ed Estella Mazzetta, sontgaclauvitg@hotmail.com

15:45 viseta da Sontgaclau e sia suite el Puntreis
17:00 viseta da Sontgaclau e sia suite ellas casadas

Gonda, Dulezi, s. Gions, Raveras

Jannik Vincenz, uggonda@outlook.com

17:00 viseta da Sontgaclau e sia suite ellas casadas

Funs, Clavaniev, Latis

Ricardo Flepp, sontgaclau@protonmail.com

17:00 sentupada cun il Sontgaclau e sia suite ella Vella per tut ils vischins da Funs, Latis e Clavaniev
18:30 viseta dil Sontgaclau e sia suite ellas casadas

Segnas, Acletta

Lara Bergamin, ugsegnasacletta@gmail.com

16:00 viseta da Sontgaclau e sia suite ellas casadas
21:00 prelecziun digl oremus cun punsch e petta avon la caplutta d'Acletta
21:30 prelecziun digl oremus cun punsch e petta avon la sechentaria Sialm a Segnas

Mumpé Medel

Rita Manetsch, ugmumpemedel@hotmail.com

19:00 viseta da Sontgaclau e sia suite ellas casadas

Pardomat, Madernal, Disla, Cavardiras

Lucas Lutz, lucas.lutz@icloud.com

17:00 viseta da Sontgaclau e sia suite ellas casadas
20:00 viseta dil Sontgaclau e sia suite ell' uustria Fravia



Sentupada d'Advent a Segnas

Il vischinadi Segnas Mumpé Tujetsch envida cordialmein ad ina sentupada d'Advent. Nus serimnein **sonda, ils 2 da december 2023** allas 16.00 a Cuož avon caplutta da s. Giachen e visitein silsunter communablamein las ulteriuras finiastras a Buretsch (fontauna), Casa Nauscha (sper via) e sin plaz scola a Segnas. La finiziun ha liug el Camp Glaretsch, nua ch'in pign puschegn spetga sin pign e grond.

Las quater finiastras san vegnir contempladas entochen Buania.

Vischinadi Segnas Mumpé Tujetsch

Vischinadi Segnas/Mompé Tujetsch

Nossa **radunonza ha liug venderdis ils 8-12-2023** allas 20.00 en scola a Segnas.

Tractandas usitadas

Orientaziuns:

- Traffic public (president vischnaunca René Epp)
- Casa da scola Segnas (gerau Schmid Paul)
- Sutpassadi Salez (gerau Jacomet Wendelin)
- Orientaziuns plaz da moviment (gerau Berther Clemens)

Tuts vischins/as ein cordialmein envidai e beinvegni.

La suprastonza
